

# LIS PREDICJIS DAL MUINI

di pre Josef Marchet - Udin, 1965

## LA STATISTICHE

Cussì o sin rivâts in cjâf di un altri an. E, par vie che in plêf no je stade fate ancjemò la statistiche de parochie, o fasarìn noaltris par intant chê de nestre vile. Jo o ai notât cul zes daûr la puarte ducj i nassûts e i muarts e i sposalizis, come che a fasevin par antîc, cuant che par nassi o par murî no coventavin cjartis ni timbris.

L'an passât di cheste stagjon, a Gargagnà di Sore si jere in sietcent e otante trê; in vuê o vin di jessi in sietcent e otante vot. Pocjîs diferencis. O 'ndi vin lassâts pe strade nûf: doi agnuluts, la frutate di Pajarin che e je muarte in Sviizare (ce coventavial che Toni Pajarin al mandàs chê cristianute ator pal mont? No aial avonde par vivi, cun dut il teren che al lavore?); la viele di Treseman che e veve su lis spalîs novante carnevâi (cence vê mai fat carnevâl, puare femine) e une cjame di strussiis di ogni fate (cun chê famee bastarde dulà che i jere tocjât di vivi) e cualchi centenâr di miârs di rosaris, che dal sigûr no à tocjât purgatori nancje cu la ponte dal dêt piçul; mê comari Rose dal Puint che e je restade cu la scudiele in man intant che e lavave la massarie; il Temul di Rutice che si è brusât i budiei cu la pointe di Baduscli; Miliut Fasanel che al è restât sot i fiers tal ospedâl; Zuan Menice, biadat, che al si è visât di jessi in chest mont nome par intric, cun tantis che indi à fatis in vite sô e nissune di drete: lu vin cjatât in trê tocs su lis sinis de ferade e o vin scugnût puartâlu vie cence lûs e cence crôs, tant che une bestie: chê e je stade, par gno cont, la zornade plui nere di dute la anade.

Di batisims indi vin fats cutuardis: doi frutins a son tornâts a lâ a pene rivâts, spaventâts salacor dal mondat indulà che a jerin colâts (e cui sa che no vebin vude reson, che a dî la veretât, a jerin capitâts in dôs fameuçatis imbastidis malementri). Chei altris dodis a son vîfs e Diu lu vueli che a cressin pulît cu la anime e cul cuarp: jo dal sigûr no sarai a viodi ce umigns che a deventaran, ma si à dibisugne di int drete, che di chê stuarde indi è tante che si vûl.

Sposalizis vot: trê fantatis a son ladis a marît fûr di paîs; cuatri forestis a son vignudis a stâ culî. Ce che a son e ce che a valin jo no savarès a dî ancjemò: ator pe glesie indi viôt une sole; une altre mi pâr che e à fat l'ûf a pene rivade: misteris de nature! Une e va a fâ scuele in Perarie e si la viôt nome a buinore e di sere, cuant che e partìs o che e rive cun chê mitraie di

lambrete, chê altre e je rivade dongje chest mê s passât e jo no sai ancjemò ce muse che e à.

Di chês che a son ladis a marît fûr di paîs, Mariute di Safit e jere un bombon di frute, plene di sintiment (plui che no sô mari!): pecjât che e sei svolade vie lontan. Une altre e jere dome biele, e lu saveve tant, che dibot e sclopave di braure. La tierce no jere ni biele e ni buine e nissun si è mai impensât di vaîle.

E po a 'nd è une di Gargagnà che e je restade a Gargagnà: e à cjolt il fi di Toni dal Fôr; al ven sù di dî, cualchi volte, che il Signôr ju fâs e il diaul ju compagne!

E cussì i conts a son fats. Jo no sai se o sarai ca a faju ancje chest an cu ven: al po stai, come nuie, che mi capiti di restâ par strade, che o soi madûr. E ognidun di nô, zovin o vieli che al sei, al à di pensâ che vuê un an si po jessi tal numar di chei che a saran lâts a fâ mantiis di bocâl. Al tocje di tignîsi pronts a dut. Al diseve il puar plevan vieli che si è ducj di crep e di un moment a chel altri si po cjatâsi a flics.

Cun cheste us doi la buine sere e il bon an, cul non di Diu.